

Peqquserluuteqartarnerup akiorniarnerni suliniutit qanoq nukittorsarneqarsinnaanerit pillugu UKA 2019-mi nassuiaammik innersuussutitalimmik agguasseqqullugit Naalakkersuisut peqquneqarnissaanik Inatsisartut aalajangiiffigisassaattut siunnersuut. Nassuiaammi aamma allaasereqquneqarput iluaqtissat ajoqutillu aamma aningaasatigut kingunissat inatsisitigullu tunngavissat, arlaannaannulluunniit attuumassuteqanngitsumik Peqquserlutsaaliuisussanik pilersitsisoqassasuuppat taamatullu aamma peqquserlutsaaliuisussat pillugit inatsisiliorqassasuuppat, peqquserluuteqartarnerup akiorniarnerni suliniutinik katersiviusussamik.

(Inatsisartunut ilaasortaq Steen Lyng, Demokratit)

Akissuteqaat

(Aningaasaqarnermut Nunanilu Avannarlerni suleqatigiinnermut Naalakkersuisoq)

Aappassaaneerinnineq

Inatsisinut Ataatsimiititaliap isumaliutissiissusiorneranut Naalakkersuisut sinnerlugit qujavunga.

Ataatsimiititaliaq isumaqatigiittoq allannguutissatut siunnersuummik saqqummiussaartoq Naalakkersuisunit maluginiarneqarpoq, tassani nassuiaatip siunnersuuteqartumit kissaatigineqartup 2020-mi upernaakkut ataatsimiinnermi, tassalu ukioq ataaseq qaangiuppat, naammassineqarnissaa siunniunneqarluni. 2018-imi ukiakkut ataatsimiinnermi aalajangiiffigisassatut siunnersuutip matuma siullermeerneqarfiani nassuiaat kissaatigineqartoq 2020-mi ukiakkut ataatsimiinnermi agguanneqarnissamut piareerneqarsinnaassasoq Naalakkersuisunit nalunaarutigineqarpoq. Ataatsimut isigalugu Inatsisinut Ataatsimiititaliap allannguutissatut siunnersuutaa ima nassataqassaaq, Naalakkersuisut inassutigeqqaagaannut sanilliullugu nassuiaammik suliarinninnissami piffissaritinneqartoq ukiumik ataatsimik sivikinnerulissammat. Suliap taama siuartinneqarneratigut sulisutigut aningaasatigullu unammilligassat isumaliutiginnissaannut Inatsisinut Ataatsimiititaliaq isumaliutissiissummini isumaliutiginninnissaminut pisariaqartitsisimangilaq, imaluunniit apeqqutip tamatuma Naalakkersuisunit naliliissummik pissarsiniarsimanani.

Tassunga atatillugu immikkoortoq 81 pillugu ataatsimiinnermi matumani Inatsisinut Ataatsimiititaliaq isumaliutissiissuteqarmat Naalakkersuisunit aamma innersuussutigineqassaaq. Aalajangiiffigisassatut siunnersuut taaneqartoq naapertorlugu Naalakkersuisut whistleblowerimut atatillugu immikkoortortaataaq qissuussaannikkut allamut inissinneqarnissaa kissaatigineqarpoq. Tamanna pillugu isumaliutigineqartut

aalajangiiffigisassatut siunnersuummi matumani siunertarineqartut pillugit nassuiaammi ilanngunneqarsimasinnaagaluarput.

Siuliani oqaatigineqartut aallaavigalugit ataatsimiititaliap allannguutissatut siunnersuutaa maanna akuerineqartussatut inassutigineqartoq Naalackersuisunit malinniarneqassaaq, aammalu Naalackersuisut suliniuteqaqqinnerminni ataatsimiititaliap isumaliutissiissutai pisariaqarfiatigut ilaatikkumaarpaat.